

Grupo 9 di Formacion Social a haya certificado di Prome Minister Mike Eman

Mamanan orguyoso di e programa y loke cu e ta haci pa nan yiunan

MAMANAN sigur ta contento cu loke e programa di Sociaal Vormingstraject (SVT) of Trayecto di Formacion Social a haci pa nan yiunan. Den tur e combersacionnan por scucha e diferencia of e cambionan cu e programa ta trece cerca e hobennan participante. E ceremonia di entrega di baret ta señal cu nan a finalisa e prome parti di nan formacion cu exito. P'e ocasion aki famianan a wordo invita pa presencia e evento den Mariniers Kazerne.

Sra. Angela ta un di e mamanan cu un cara feliz y yena di orguyo na momento cu el a mira su yiu, Edilio Angela, ricibi su baret for di Prome Minister Eman, e motor tras di e programa. E mama orguyoso ta corda ainda cu el a lesa di SVT den corant y "mi a hay'e algo fantastico pa mi yiu debi cu e no a caba su scol."

Sra. Angela awe ta sinti cu e tabata un bon decision, "ya cu e programa ta yuda mi yiu sinti su mes bon, cu futuro y pa ami ta sinti mi mes orguyoso di dje".

Sra. Angela na final di e ceremonia a conta con tin biaha e tabata haya duel'e di mira con cansa su yiu ta yega cas.

"Pesey mi ta contento cu el a finalisa e parti aki," e mama a bisa cu hopi emocion.

Mayornan por inscribi nan yiunan pa forma parti di Formacion Social, pero e hoben mester duna di su parti tambe.

Pesey e team di SVT encabesa pa Jessy Ras y su ayudantenan ta guia e hobennan den Mariniers Kazerne, ora cu nan bay cas y hasta despues di finalisa e curso.

"E ta algo cu nos ta aprecia masha hopi. Na tur momento nan tabata cla pa duna nan apoyo. Nan ta sostene nos pa nos duna nos yiu tur apoyo pa sigui den e programa," sra. Angela a reacciona riba e trabou di esnan cu ta dirigi e programa.

E mama aki tabata hopi agradecido na Prome Minister Mike Eman. Opinion di sra. Angela riba e programa Formacion Social ta algo cu mas mama, manera Sulaika Bareño, ta comparti.

Sra. Bareño a splica cu nan a tende di e pro-



grama aki via di amigonan y dos biaha su yiu Edmar Lampe a inscribi y haci e test pa drenta e programa y februari ultimo finalmente el a logra drenta. "Mi tabata kier p'e haci algo diferente".

Den e caso aki, e hoben mes t'esun cu a dicidi cu e kier un cambio den su bida y a busca pa haya sa contenido di e programa y despues a inscribi.

E perseverancia di Edmar pa finalisa e programa ta demostra den e hecho cu el a busca un bicicleta como su transporte pa yega Kazerne for di su cas na Cashero.

Esaki ta nifica cu e ta lanta 5'or di madruga, traha su desayuno pa yega na tempo kazerne.

"E mester por haci su cosnan su mes, pasobra mayan mi no tey," e mama a expresa. "E proyecto aki pami tabata un bendicion. Petje af pa Prome Minister Eman."

Tur interesa den participa den e programa SVT, por pasa busca formularionan di inscripcion cu ta obtenibel na Bestuurskantoor of na edificio di MFA Noord.

Hunto cu e formulario ta pidi pa entrega un copia di ID valido. Tambe por yama e numbernan

522-5353 of 592-6160 of manda un email na info.formacionsocial@gmail.com.

E proceso di inscripcion y registracion ta inclui datonan di e hoben, un examen medico y un entrevista personal.



AWE Mainta

 www.facebook.com/awemainta
 www.awemainta.com

#1 Online